


Van der Klooster y Bakker di Oficina di Monumento: **"Exito o fracaso di conservacion di edificionan historico ta depende di un poblacion conciente"**



ORANJESTAD(AAN): -- *"Exito o fracaso di conservacion di monumento ta depende di un poblacion conciente. Ta e poblacion di un lugar mes tin cu realiza e importancia di conserva su monumentonan y mester por kier esaki tambe".*

Asina historiadonan arkitektonico Olga van der Klooster y Michel Bakker ta bisa den un entrevista cu DIARIO encuan to e proyecto 'Waardestellingen' cu nan ta haciendo actualmente pa Oficina di Monumento di Aruba.

E proyecto aki ta encera cu e dos expertonan riba tereno di historia arkitektonico ta bishita, studia y describi 225 edificio nomina pa forma parti di e Registro di Monumento.

Alavez di e 225-nan aki, tin 75 lugar mas riba e lista di nominado y señora Van der Klooster y señor Bakker lo bolbe Aruba na culminamento di año 2000 pa studia y describi nan tambe.

Van der Klooster y Bakker ta bishita diesinco pa binti edificio historico pa dia, acompaña pa Roland Lejuez di Oficina di Monumento, kende ta fungi como chofer, guía y traductor pareu.

Den e entrevista cu DIARIO, nan ta bisa cu no tin un porta na Aruba cu ta keda cera pa nan y cu nan ta wordo ricibi cu gran cariño tur caminda cu nan yega.

Nan ta kere cu conservacion di monumento ta

cuadra cu deseo di Pueblo di Aruba y ta mira cu nos poblacion ta sumamente envolvi y interesa den su herencia cultural.

Durante nan recoridonan riba Aruba, nan a ripara cu Pueblo tin masha compasion pa e manera cu Aruba ta luci (esta, pa e 'imagen' di Aruba) y ta bisa cu mester tin cuidao pa no destrui e imagen aki, por ehempel door di basha edificionan abao o lanta arkitektura horrible.

Segun señora Van der Klooster y señor Bakker, hopi Arubiano ta sinti nan mes personalmente envolvi, tambe pasobra e edificionan bieu ta forma parti di nan historia di famia.

Ademas di e proyecto 'Waardestellingen', e dos historiadonan ta trahando riba un *Guia di Arkitektura di Aruba* cu lo ta un paso esencial den cuida di monumento y lo sirbi pa haci Pueblo mas conciente ainda di su herencia cultural.

E Guia Arkitektonico lo sali medio año venidero y lo contene informacion tocante e edificionan historico di Aruba y lo trata temanan manera con e lugar a wordo construi, ki clase di material a wordo usa, ki estilonan di construi tin na Aruba, ki rol e influencia climatologico ta hunga, et cetera.

E importancia di e Guia di Arkitektura ta cu e lo ta accesible pa un publico grandi, otro cu e Registro di Monumento cu aunke en principio

openbaar, lo wordo usa mas como herment di maneho.

Señora Van der Klooster y señor Bakker ta spera cu Guia Arkitektonico lo haya bon acogida bao di Pueblo y cu e lo yuda pa hende mira cu cuida di monumento ta parti di interes general.

Edificionan bieu ta manera documentonan historico di e temponan cu a pasa y arkitektura na Aruba ta refleha influencia di varios otro cultura.

Tuma por ehempel, e cas den Wilhelminastraat na Playa na unda Papiamento Restaurant tabata situa.

E hendenan cu tabata doño di e lugar aki tabata haci hopi negoshi cu Colombia y a traha e cas segun ehempel di un cas na Cartagena cu nan lo a gusta asina tanto, cu nan a laga duplike na Aruba.

Van der Klooster y Bakker a haci contacto cu Colombia ultimamente pa haya sa mas tocante e cas original cu probablemente ta para somewhere na Cartagena ainda.

Durante e entrevista cu DIARIO, Van der Klooster y Bakker a enfatiza e importancia pa amplia e grupo di 225 nominado pa e Registro di Monumento cu 75 mas, manera menciona tambe na inicio di e articulo aki.

Un registro di 225 lo duna insuficiente proteccion na e herencia arkitektonico den su totalidad y lo laga algun monumento esencial afor.

Segun van der Klooster y Bakker, un parti di Aruba cu



lo keda grandemente afor den caso no amplia e registro di nominado, ta San Nicolas.

Den nan opinion, tin espacio riba e registro di nominado pa edificionan historico na San Nicolas y envez di e dos pa tres cu ta parece actualmente riba e lista, calculacion ta cu lo por registra entre binti pa treinta monumento.

Hopi di e arkitektura di gran valor historico a keda intacto na San Nicolas.

Señor Bakker ta menciona den e entrevista, e asina yama 'dollhouses' como ehempel di arkitektura

valioso na San Nicolas, cu ta e casnan manera di popchi, cu porta y bentananan chikito y cu porchnan miniatura nan dilanti, traha pa e imigrantenan di islanan Ingles tempo cu LAGO a habri.

Segun Bakker, ta importante pa inclui e edificionan historico na San Nicolas tambe, sino e registro lo no ta balancea.

Fotonan: (di robez pa drechi) Roland Lejuez, Olga van der Klooster y Michel Bakker durante e entrevista cu DIARIO y e cas monumental di Ecury den Rancho.

ALLEGRO RESORT Aruba

Is accepting applicants
for the following positions:

- * **CLEANING WOMAN**
- * **HOUSEMAN**
- * **LAUNDRY WORKER**
- * **BANQUET CAPTAIN**
- * **ASSISTANT COST CONTROLLER**

Please apply on Tuesdays and Thursdays at the
Human Resources Department
from 9:00 a.m. - 11:00 a.m.